

22 NOV 2001

Agong-Ziarah

RAKYAT ZIARAH JENAZAH YANG DI-PERTUAN AGONG

KUALA LUMPUR, 22 Nov (Bernama) -- Ribuan rakyat jelata menziarahi jenazah Yang di-Pertuan Agong Sultan Salahuddin Abdul Aziz Shah di Istana Negara di sini hari ini untuk memberikan penghormatan terakhir kepada Seri Paduka yang mangkat semalam.

Mereka datang tanpa menghiraukan hujan gerimis dan cuaca mendung yang seolah-olah turut meratapi pemergian Sultan Salahuddin yang cukup terkenal dan disayangi kerana sifatnya yang sederhana dan mengasihi rakyat.

Jutaan lagi rakyat Malaysia yang bersedih atas kemangkatan Seri Paduka mengikuti upacara memberikan penghormatan terakhir itu menerusi siaran langsung oleh Radio Dan Televisyen Malaysia (RTM).

Jenazah Seri Paduka diletakkan di persada khas empat segi tujuh tingkat bersalut kain kuning, dengan pegawai tentera darat, udara dan laut serta polis berkawal di keempat-empat penjurunya.

Darjah-darjah dan bintang kebesaran almarhum disusun di sekeliling aras lima persada yang dibina di tengah-tengah Balairong Seri istana itu.

Bacaan ayat suci Al-Quran berkumandang di ruang itu ketika kerabat diraja, orang kenamaan dari dalam dan luar negara serta orang ramai memberikan penghormatan terakhir mereka kepada almarhum.

Acara itu dimulakan oleh Raja Permaisuri Agong Tuanku Siti Aishah yang berpakaian serba putih, diikuti Pemangku Raja Selangor Tengku Idris Shah dan anggota kerabat diraja Selangor.

Tuanku Siti Aishah kemudian duduk di sebuah kerusi khas dengan ditemani adinda-adindanya dan isteri Perdana Menteri, Datin Seri Dr Siti Hasmah Mohd Ali.

Beberapa kali Raja Permaisuri Agong kelihatan mengesat air matanya pada wajah yang membayangkan kesedihan berikutan kehilangan Seri Paduka yang mengahwininya pada 1990.

Yang turut memberikan penghormatan terakhir ialah Timbalan Yang di-Pertuan Agong Sultan Mizan Zainal Abidin dan Permaisuri Nur Zahirah, Sultan Kedah Sultan Abdul Halim Mu'adzam Shah dan Sultan Perak Sultan Azlan Shah.

Sultan Hassanal Bolkiah dari Brunei Darussalam dan Presiden Megawati Sukarnoputri dari Indonesia turut hadir untuk memberikan penghormatan terakhir kepada Seri Paduka yang mangkat pada usia 75 tahun di Pusat Rawatan Gleneagles Intan, Jalan Ampang.

Antara pembesar negara yang mula-mula memberikan penghormatan terakhir ialah Perdana Menteri Datuk Seri Dr Mahathir Mohamad dan Dr Siti Hasmah.

Timbalan Perdana Menteri Datuk Seri Abdullah Ahmad Badawi dan menteri-menteri kabinet turut berbuat demikian.

Setiap orang kenamaan yang menziarahi jenazah Sultan Salahuddin turut bertemu dengan Tuanku Siti Aishah untuk menyampaikan ucapan takziah.

Jenazah almarhum berada di Balairong Seri sehingga tengah hari ini sebelum diusung dari Istana Negara dan dibawa dengan pedati khas ke Dataran Merdeka dalam perjalanan ke Istana Alam Shah, Klang.

Di SINGAPURA, Perdana Menteri Singapura Goh Chok Tong menandatangani buku takziah sempena kemangkatan Seri Paduka yang dibuka di kediaman Pesuruhjaya Tinggi Malaysia Datuk Hamidon Ali di Dalvey Estate.

Antara mereka yang turut menandatangani buku takziah itu ialah anggota perwakilan asing di republik ini.

Presiden Singapura S.R.Nathan dan Timbalan Perdana Menteri Lee Hsien Loong berada di Kuala Lumpur untuk memberi penghormatan terakhir kepada

almarhum.
-- BERNAMA
MAM AHH NMO